

【鵝情】徐維莉原作

媽祖生正過了，雙連陂嶼面上个日頭花，七早八早即跋起來，嘎嘎呷个鵝，在一痕痕水波个中大湖答嘴鼓。野生鵝菜在泥底鑽出青青个葉，這陣鵝驚係鼻著青草个乳蕈，短短个腳掌出力跋上崁，肥卒卒个屎朏著面行著面搖，圍野生鵝菜直直啄。過路个妹子么擋恬腳步，翕相翕無歇，講：「真得人惜哦！」敢正經有恁得人惜？

猶細漢个時，阿媽嘛有供一大陣鵝，佢總係擘心遐陣鵝食無飽會供毋會大，逐日天吉光即走去菜園捋淦淦一大菜籃个鵝菜，喊佢拗鵝菜切幼來得鵝食。佢擔一張矮凳坐在屋簷下个樹籬脣面上，阿媽交待佢講：「愛細義哦，手指頭愛勾起來，毋好伸長長，正毋會切著哦。」背痠痠个佢提著一隻腳盆，舀一大杓粗糠攪飯，猶會囡一兜麥片和番麥落去，佢講：「阿媽，鵝有飯食又有菜好傍，食到恁豐沛哦！」阿媽笑講：「恁佢人个腸正會胖大啊！」毋知鵝个腸有胖大無，佢正知愛漕菜葉个時，定著愛企較遠兜，毋係講佢係驚蹬著遐青青个鵝屎，其實佢係驚一失神得遐大鵝公啄著，遐即死無命啊，遐一大搭烏青，正經即趁著疾啊！

遐囡子，正三、四歲外个阿弟和表弟嘛賞到真煞著，走上走落去弄遐陣在禾坪食草个鵝，鵝得佢人弄到發癢，頸擲到長長，

嘴擘到開開，嘎嘎呷啄過來，這兩個鷺細子猶想講鵝在和佢人賞「鷺婆捉雞么」，暢到哈哈大笑，走得鵝捎。哪知，這時務會得佢人瞞著一隻在角脣食草个鵝豚仔，兩儕跔到低低，啗啗咕咕講細聲事，恬恬行過去，一瞞目遐隻鵝豚仔个長頸即得佢人捉著，兩儕躡過鵝豚仔个背脊餅，搭著佢个頸，屎朏坐落去，鵝豚仔準馬騎，這擺即正經好賞啊。聽著兩兄弟賞到咕咕呷个笑聲，阿媽行佷過來睜下，睜著遐隻硬硬討昏去个鵝豚仔。阿弟睜著阿媽，著驚一下，手一放，阿媽攔緊拗鵝承起來，講：「啊好啊！這愛仰子正好！」翻轉頭開聲即罵：「你這兩隻猴，麼个毋好賞，捉鵝賞？這無修理仰子會用咧！」阿媽竹筱擎到高高，阿弟驚到著面跳著面嘍，目汁溶溶滴講：「佢毋敢啊啦！」阿媽罵到砰砰呷，阿弟嘍到噉噉呷。阿公堵好對田底行轉來，問講：「仰子？仰子啊？」阿弟跔著阿公个腳尾攔緊趕入廳下，阿媽輕輕抱起遐隻鵝豚仔行去屋背，著面行著面講：「後次擺即愛跔來，知無？這下愛先去做仙啊哦！」

前兩年，阿媽百歲過身跔阿公去天嶼做神，逐擺行過靚靚个中大湖，聽著遐嘎嘎呷个鵝聲，即會想討臥起頭問：「阿媽，天嶼个風景靚無？你兩儕係毋係逐日逍遙自在牽手遊四海啊？你人愛記得拗天嶼遐隻鵝講：『遐兩隻猴么，這滿攏有認真做頭路，惜爺、惜哀、惜子、惜夫娘，拜託你原諒佢人好無？』」青山白雲照在水面，白鵝綠水洄過，真真聽著一聲一聲應講：「好！好！好！」有你人做伴，真好。

108 年全國語文競賽客家語朗讀文章社會組（詔安腔）

編號 02 號

【牛眼樹下】邱坤玉原作

有一兜事情一世人攞毋會用做，有一兜事情無做一世人即遺憾！

來到夏至個時務，地勢高平個美濃山下，一圖圖個燒氣衝毋會過月光山，貶輪轉輪落來，遐燒氣愈衝即愈燥，歸個暑假個燒氣舞到牛眼花開滿天，飛到歸美濃山下。

阿玉做一個毋成生理，好佳載渡遐個夫娘性地善良內向，恬恬無粉無妝，見人即笑到嘴笑鼻嘆！睺著丈夫日合夜無閒挾掣，人講「會管千軍萬馬，難管廚房灶下」，佢無論麼個四頭四尾，歸下包辦，相夫教子，真會捍家，實在得人惜，隔壁屋邊「褒」到熟烙，儕儕都安啣！

毋過，想著猶有爺母蹣在莊下，逐日上班又無法度逐日問燒問冷，實在係人在屏東，心在美濃，不時掛念著老人家個燒暖。真久無轉去啊，拜六晨早打早起來，夫娘即整理好大摺細摺，正喊丈夫載歸火灶大細轉美濃。

細子人一入門睺著阿公阿媽，大家即攬作埕，歡喜到吱吱啉！猶愛阿公渡佢人去放紙船。毋知阿玉這隻鷄猴，前腳正蹬入門，後腳即安心毋會落，毋知阿母想孫個心情，普通時無細子人做伴個孤單，佢嘎攔緊緊講：

「阿依，佢韶日打早即愛轉屏東啊！」

「毋係正轉到屋下？屎肫攞旨坐燒，急麼个，唉……。」

「佢嘛想……，毋過……。」

「好啦！阿依知啦！」

恬靜个暗夜，露水越來越重，狗吠聲越來越悽慘，和星光嘛失去笑容，黯淡个心情真像阿依失去愛子个孤單！屋背个月光搖啊搖，點點个光貼在飽米个牛眼面上，照到黃色个果皮透光，果肉水分飽滲，一粒一粒像黃金共款。

屋背牛眼樹下窸窣窸窣个聲，吵醒大家……

「阿依，恁暗你跋到恁高做麼个？」

「阿玉，你自細到大即愛食牛眼，這滿牛眼飽又擱黃，加捋幾下粒得你隨去屏東食啦！」

「噯啲，阿依，樹恁滑，牛眼又重銚銚，毋好跋到恁高，佢屏東買即有！真便宜啦！」

「你仰子恁鷄咧，屋下个較甜！」

惜子个心情即像這頭老牛眼樹，愛拗牛眼供到粒粒都水份飽滲，毋過等到水份飽滲啊，又一粒一粒離開樹極，跌到歸泥下都係！這敢即係天下父母心？阿玉頭犁犁擎毋會起來，佢知做人爺母頭艱難个係子女个「離開」！

「無要緊，牛眼黃啊即會落蒂，毋使擘心！」

「隨去，這兜牛眼隨去屏東，想討食即有。毋好恁無閒，身體愛顧，事頭做嘛做毋會煞个，毋好和睡都毋罅，知無！」

「好啦……。」

暗夜露水，越來越重，月光个光，嘎顛倒越來越光。

【煮汁】李得福原作

想起讀小學個時，放學轉到屋下，煮汁即係佢個事頭。逐日食自家個飯，做自家個事，若佢拚勢鬥相共，即會用減輕阿依個辛苦。這種輕可事，對佢來講，兩下半即做好啊。學校作業較少個時，佢猶會洗米煮飯、洗好青菜，等阿依放工轉來好煮暗頓。

煮汁即係焗供豬個料，佢拗豬菜園在菜絞頭前，阿依拗絞好個豬菜抔落大鑊底，放水放到睇起來堵好浸到豬菜，水傷多傷少攞毋會用。拗鑊蓋弁好，用檳榔葉網個草網起火，擱燒檳榔葉個硬殼，一皮一皮炙燥個殼窿入灶坑內底。火真猛，大鑊一下即熱鑊起來。這下機會來啊，佢會偷偷捽幾下條番薯園入大鑊底，等下兄弟姊妹放學轉來即有點心好食。鑊底嘩嘩暴暴直頭鳴，水滾啊即毋好擱添樵。拗鑊蓋打開，若無，豬菜會過頭綿，炆個汁會臭黃臭黃，豬較無愛食。

田底個豬嫲乳生著真靚個時，阿依會擱一兜用畚箕擔轉來，園一兜豆籬落去煮，煮到歸灶下香噴噴，豬食到嗷嗷嘍。成過，野莧菜生到歸檳榔園，阿依會割到一網一網，用籬一擔一擔擔轉來，像豬菜共款絞綿來煮。園一兜仔豆籬惑豬，豬嘛食淨淨，和

粕都無伸。

弓蕉園若有較嫩較細條、無愛個弓蕉筍，阿依會載轉來，用菜刀慢慢剝得佢綿綿，抔落大鑊煮。後次擺交弓蕉時打莫個弓蕉尾，割莫個散條稞貨蕉，嘛係撿撿做一鑊焗；煮弓蕉筒得豬食，久久正堵著一擺，愛在插過番薯秧，豬菜猶大毋會赴，無豬菜好捽個時，正會煮弓蕉筒供豬。

見煮汁若有園弓蕉落去焗，佢人即會行去大灶脣，提大支煎匙勾弓蕉，弓蕉尾焗到烏烏，剝開搵豆油，鹹甘鹹甘真爽口，食肚嘛一條擱一條食毋知飽。遐帶一兜仔臭水味臭水味個汁蕉，係佢頭難添放個蕉味。這滿想著會去買青弓蕉轉來焗，一擺兩擺總焗毋會出共樣個童年味素。

聽阿依講，煮汁供個肥豬，肉質較韌、有甜味，較好食。逐擺賣大豬得刷豬個，價數攞比隔壁屋邊賣較高。阿依會拜託佢留十斤三層肉、一對豬前腳、擱轉來園冰箱個冷凍庫冰，慢慢煮來食。

108 年全國語文競賽客家語朗讀文章社會組（詔安腔）

編號 04 號

【四時个米籬】彭瑞珠原作

識睭過冬頭个米籬，跔人在田底做事，承起一抔又一抔个禾穀，得人一擔又一擔个擔去禾坪，炙起一行擱一行个收成。遐一行一行炙燥个有穀，裝入米籬、擔入穀倉，躉到高高，躉起一穀倉个豐收。

識睭過春天个米籬，得人擱去浸穀種，得人提去擔番薯，承接作穡人个煞著猛醒、承起一屋下人个想望。遐春天个米籬，嘛識承接臭乳犇个細子人，得佢揪著大人个衫枝尾，用比泥下較高一兜仔个高度、在米籬內底搖搖擺擺，跔人行入春天个山色。

識睭過熱天个米籬，裝到淦淦一極又一極極極拮拮个牛眼，裝到淦淦一粒擱一粒橢鴨卵形个土芒果。遐兜土芒果，係屋下面頭前个老芒果樹打个；遐兜牛眼，係滿園个老牛眼樹、新牛眼樹打个。

「遐閒間，有土芒果哦，細子人佢人拮好个。若有閒，愛記得轉來，載一兜轉去鬥食。」

嫁出去个阿女，總會在熱天接著做人阿怙難得个電話，喊佢人轉去提一兜自細食到大个果子。佢人對米籬內底抔起來个，係

阿怙个惜；佢人對米籬內底，猶聽會著个，係阿怙个吩咐「若有閒，愛記得轉來」。遐兜熱天時務个果子，總係在米籬內底裝到淦淦、躉到高高，一年又一年。

識睭過秋天个米籬，裝著大嫲粒个冬瓜、金瓜，得人用畚擔擔入灶下。係幾有額个冬瓜，愛用米籬去擔咧？

「啊，佢个菜籃驚擔佢毋會贏哦，愛米籬正奈佢會何！」

遐係阿媽留个好種，遐係阿依煞著沃水、斷心種出來个大冬瓜、大金瓜。一籬一籬青皮个冬瓜、黃皮个金瓜，得人用米籬對菜園擔入灶下，塞到歸灶下秋天个色地。

四時个米籬，不時都入夢，因為米籬內底，猶裝著阿公在山園个身影，猶裝著阿怙對子女个惜心。因為米籬內底，識裝著阿媽个想望、識裝著阿依个煞著猛醒。因為米籬內底，識裝著佢搖搖擺擺个童年。撈腹个米籬，識裝著一屋下人个想望，識裝淦一屋下个感情，嘛識躉高一年又一年个收成。

【種花先生】林伯燮原作

輝伯燮真愛種花，佢屋脣个花一年四季輪流開，恬有愛睇花个人去佢个花園欣賞。和輝伯燮較熟事个人大概攞知，晨早時、討暗時若討尋佢，直接行去花園即會用，若先去屋下顛倒會相出路，因為，佢有閒即會在花園內底摸花，嘛會用講，沃花、擲草、落肥、剪極、換盆這兜花園內底个事佢根本即毋識做煞，逐頭花佢攞睇做係寶，小心細義照顧，花若過佢个妙手，即像換過新衫，生著又靚又有精神。有一兜屋邊種毋會活个花猶撥工提去拜託佢救，等過一站，花可能發到和主人嘛險險認毋會出來，大家安啱佢恁會種花，輝伯燮總係笑笑應講：「你人愛上班做事，時間哪有佢恁多！」毋過，大家都知佢對種花嶄然用心，應个係氣客事定。

在佢蹠个莊頭，種菜个人多過種花个，輝伯燮成過嘛係種菜較多，自興種花了後，慢慢收集各種花秧，花正漸漸變多，有一兜人知佢愛種花，會提花來送得佢，嘛有人招佢共下去花市睇花、買花，久啊，輝伯燮嘎變成本莊个「種花先生」，佢个屋下自然變成討論種花个所在，大家有堵著種花个問題，第一即係想

討去請教佢，佢嘛真大方，麼个花攞真盼得分人。猶有一兜花傳到佢个手，過一站，遞開來，又傳得別儕，有人即笑講：「賣花个硬討即無生理啊！哪儕猶敢賣花得佢？」有一兜屋邊得佢影響，變到想討睇花，即起勢在自家个屋脣、菜園角學種花，各式各樣个花即恁漸漸在社區開出來。

一半下，輝伯燮和花友會共下去學校奉工，鬥種花、整理環境，佢會先睇好花愛仰子種、樹極愛仰子鋸，正請大家來動手；有一兜人手毋罅个所在，花草久無人管理，佢嘛會自動去修剪、沃花，佢毋單惜自家種个花，和公眾个嘛共款，有睇著無順个所在，即準備討出手。

輝伯燮真起客，大家愛去佢个屋下睇花以外，嘛愛去尋佢坐寮。佢个後生利用屋脣个大樹梗編一個晃槓子得細子賞，熱天時，細子在樹下晃槓架，大人在樹下睇花、講花，歸下即恁快活。有時，佢會招屋邊來睇佢个後生正對外國翕轉來个新相片，大家作埕講天講地，歸屋間鬧熱滾滾。現時，輝伯燮个子兒拗這座屋提供出來，當做公眾推廣環保活動个場所，對種花、惜花、奉工到環保教育，種花先生應當無想著會有這兜轉變。

108 年全國語文競賽客家語朗讀文章社會組（詔安腔）

編號 06 號

【大擱過細擱】賴維凱原作

在高鐵內底食肚早即變餒餒啊，睺著面上架嶼大包細包个包袱重鈦鈦，嘎否勢啟開來食，高不將打得阿姊，睺望今日暗夜煮麼个。阿姊講暗夜無煮，害佢掣一下，冰箱內底正伸一碗公舊飯定。佢講遐定著猶有嫩薑！阿依逐年這時攞會滷嫩薑，滷好歸大面盆，即會拗阿姊普通時愛食个菜：蕨、鵝菜、肉丸、嫩薑牛肉、炒大腸、地豆排骨湯，猶攞有自家灌个煙腸……，做一下擱到臺南佢阿女个冰箱冰起來。阿姊講佢仰子恁知？猶講前幾下日阿依正對屏東擱過來，猶言開封，係毋係得佢鼻著啊？姊丈猶在遐直直唸，仰子得阿依擱恁多、恁重！「無，佢个愛食痣係仰子來个？」佢應阿姊。「遐即炒卵飯傍嫩薑，恁即真傍會落飯啊。」佢著面講，著面吞口涎水。

毋過，做阿依个敢總係恁？自佢有印象，外媽逐年歇熱攞會渡佢人細子么去臺北睺阿姨，自頭毋識歇過一擺，毋過若一想著遐時攞愛鬥擱十外斤重个嫩薑和歸大墩半生熟个菜，這滿猶係有一兜仔驚。連駛國光號个司機都忍毋會核問，臺北恁多菜好買，仰子猶愛大擱細擱，重到硬討死？佢總係笑笑个，無加講麼

个。外媽普通時事真少，正有一件事情以外——臺北个阿姨推電話來！兩子哀會用講討半點鐘到一點鐘久！逐擺睺著外媽接著佢阿女个電話，即知外媽暗夜又驚係睡毋會落眠啊！

電話掛核，佢聽著外媽像先生恁，在認真教阿依滷嫩薑个聲：嫩薑逐年六、七月即會大出，買擱較多都毋驚。買來愛先洗得佢淨俐，洗个時愛像拗阿休洗臉身共款，款款子洗，毋好拗著，洗好啊愛園得佢晾燥，正擱園鹽去揸，揸到出水，即拗水漕莫，好得佢軟身，這時務即定著毋好擱碰著水啊。等佢軟身个時務，即會用在鑊底放水啊，豆醬、白砂糖嘛做一下園園落去，煮得佢滾。若討較鹹个來傍飯，豆醬即擱加園一兜！若討打淨食，糖即擱加漕一兜。等豆醬這兜煮滾，愛等佢燒暖燒暖个時，正潑在嫩薑面上，得歸盞个嫩薑浸過面上，過兩三日即會用食啊。外媽像總舖師恁有般。

高鐵略略仔掣一下，臺南站到位啊，幾時這一點鐘擱四十三分个車班，會用得佢想起細漢時恁多个事情，想著外媽和阿依兩子哀，攞係為著阿女，毋管佢人蹠在哪位？逐年這個時務，總係提著大面盆，內底裝淦淦个嫩薑，在遐掌鹽个形，唉？佢嘴脣，若像囚著麼个鹹鹹啊？

【攔鴨個人】李秉璋原作

清朝時務臺灣三大民變，第一個起來擎旗造反个朱一貴¹，人喊佢「鴨母王」。傳說佢供真大陣个鴨，猶會指揮鴨做部隊。仰子朱一貴毋係供雞供鵝，嘎來供鴨咧？這即愛睭雞鵝鴨哪種頭合陣？雞若放出去滿山飛，古早事講「雞飛狗跳」。鵝驚驚，攔出門毋知路好轉，得人喊做「驚頭鵝」。鴨頭合陣，攔出去毋會脫隊烏白走，歸陣排到好勢好勢，真有規矩，真有順序。作埕賞水、作埕絡食，無像雞性興啄²。鴨嘛頭毋會擇食，會食穀、食蟲、魚、田螺、蛭子、青草這兜，老儕事講个「鴨滌³內底無隔夜蟲蟻」。尤其係菜鴨⁴會食摺真會生卵，正經係「有食生到死，無食死毋生」。佢人實在係成過莊下人个好朋友。

四、五十年前臺灣南部有一種季節性个「游牧民族」——「攔鴨人家」。臺灣个禾，大部分係兩冬⁵，南部屏東較熱割三回。割禾逐回攔對南部慢慢割向北部。這時務攔鴨人家即會買幾下千隻鴨么，歸屋下个兄弟、公姐，大家四、五個作埕來攔鴨。

¹ 朱一貴：音 zhi` rhid` gui^；清代三大民變之一的首領。康熙年間因臺灣知府貪污，住今高雄內門的朱一貴首先造反，但旋起旋敗。

² 性興啄：音 sin^ hin^ du^；指雞性格好鬥，時常互啄。

³ 鴨滌：音 ab` teeu`；鴨寮，養鴨用的小房子或草寮。

⁴ 菜鴨：音 coi^ ab^；蛋鴨。

⁵ 兩冬：音 liong^ dung^；稻子一年兩穫，六月的早冬和年底的尾冬，因此有兩冬。

打早即拗鴨攔落正割禾過个田底去絡食，田底个水芋、青蟲、禾串、穀粒、蛭子，水底个田螺、水草這兜攔係佢人頭佢意食个。攔鴨个人毋使提飼料得佢人食，佢人有頭天然个好食物在等佢。睭著佢人頭犁犁⁶認真在尋食，有時務攔會出聲招伴來共下食、共下寮，生活到真自由又歡喜。攔鴨个人即恁逐儕攔手擎一支長長个竹篙，款款子⁷攔，著面攔著面喝「揮～揮～揮～⁸」，遐鴨仔即會照棍勢慢慢子行。即恁一坵田攔過一坵田。對打早攔到日頭落山。這時務，攔鴨人家早即尋好所在，鴨陣在闊茫茫⁹个田底歇睏。

等鴨陣攔做一下睡去，這時務攔鴨人正有時間在田中央用竹笕和布篷搭一間克難个「屋」來蹓。正拗米提出來煮飯，去撿一兜樵和禾稈好起火。飯煮好，捧著碗、食著飯，歸陣人著面講事，著面傍天竦个月。尾冬時罕得落雨，毋過寒天个暗夜吹著寒入骨个風，吹過遐一排排个麻黃樹¹⁰，一臨臨¹¹「咻咻咻」若像電影內底鬼魂討出來个聲，得人寒到啾啾顫擱驚破膽。

即恁一日過一日，一夜過一夜，希望這兜鴨么會攔緊大隻，歸屋下个希望即靠這兜。希望鴨仔毋會打毋見¹²傷多，希望野狗毋好來咬，希望這兜鴨會順順利利攔到臺北。攔較多个苦，攔較寒个天攔愛忍耐。希望歸屋下个人平平安安來過日。

⁶ 頭犁犁：音 teu` le le；頭低低的。

⁷ 款款子：音 kuan` kuan` zu^；緩緩的。

⁸ 揮～揮～揮～：音 hui`~hui`~hui`~；此處假借為趕鴨聲。

⁹ 闊茫茫：音 kuad` mong` mong`；寬闊無邊。在此指田園一片空曠。

¹⁰ 麻黃樹：音 ma` bbong` shi；木麻黃，昔日農家於田頭普遍種植做為防風林使用。

¹¹ 一臨臨：音 rhid` lim lim；一陣陣。

¹² 打毋見：音 da^ m` gien；不見、弄丟。

108 年全國語文競賽客家語朗讀文章社會組（詔安腔）

編號 08 號

【阿媽个平安符】鄒瑞梅原作

在佢做細子个時，初一十五不時跔阿媽行宮廟佛堂。逐年个年底，家家屋屋愛拚掃、愛辦年貨，做甜版、發版、菜頭版，大家攏無閒夾掣，阿媽事頭做閒啊即會渡阿哥去拜石爺。遐係阿媽聽莊頭个滿叔婆講，若係細子出世身體毋堵好，供毋會大，即會用得石爺做契子，細子即會身體康健無病無疾。阿哥出世不時破病，阿媽去拗佢算命排八字，算命先生講阿哥愛得石爺做契子，逐年愛記得換綦索，一直戴到十六歲，恁細子正供會大漢。

毋知係正經恁，抑係好福氣，拜石爺過後這一路來，阿哥个身體越來越好，讀書嘛真慶、真厲害，獎狀貼到歸廳下。大漢啊！收著兵單啊，講愛去新竹做兩年兵。阿媽聽著實在真毋盼，隨喊佢攔緊陪佢共下去廟，講愛求一個平安符得阿哥隨在臉身脣，希望媽祖婆庇佑佢去兵營平安順序。佢和阿媽兩儕緊緊行入廟內底，阿媽喊佢點六枝香，一儕三枝。佢睜著阿媽皺皮皺皮个雙手，擎著三枝清香，虔誠跪躡求媽祖婆賜平安符，換孫子一路平安順序。想嘛怪奇，阿媽求過恁多平安符，仰子會阿媽个頸一溜都毋識睜著一個平安符。

等到佢大漢啊！愛嫁人啊，阿媽牽著佢个手，共款來到媽祖婆个面頭前，共款喊佢點六枝清香，一儕三枝。阿媽个毋盼共款刻在面頰卵面上，皺皮皺皮个雙手共款擎著三枝清香，虔誠跪躡求媽祖婆賜平安符，求媽祖婆得佢嫁著好人家。阿媽求著平安符，隨戴在佢个頸拗佢講：「妹子人大漢啊，本底即愛嫁人，三從四德毋好放莫，捧人个碗飯無恁快，做人新婦毋好惜手腳，入灶下，鑊頭鑊背；落廳下，窗門壁角，煞著猛醒勤儉正會得人惜，家官家婆當作自家个爺哀來款待，公姐和諧毋好冤家，家和萬世興，聽識無？」

聽阿媽一句一句个吩咐，目汁在目珠內底輪啊輪，戴著阿媽个祝福和加持，佢會好好傳承阿媽个客家精神，煞著猛醒打拚，勤儉捍家，相夫教子，一代傳一代，興家旺族。到這滿，結婚降細子啊，感謝阿媽，勞力阿媽，一條紅紅个綦索，綦著兩子阿媽个血脈；一個四四角角个平安符，園著阿媽對子兒大細个愛惜。

【上坪个陂塘】邱一帆原作

在水道水猶言普及个年代，打井抽水、開塘作陂來滿足日常生活、作穡蔭田个用水，係真重要个事情。若講你有特別注意，離水源頭、溪水較遠个莊頭、田洋，定著會有水井，無即陂塘；離水源頭、溪水較高个山坪，定著嘛會有陂塘，無即水井。遇水井、陂塘，對遐暎子言有水道水个人來講，係真要緊个存水、用水設施。

對小南埔莊心路，一路向東南行，行過莊底个坑子橋，擱跋一截山腰石礮，頭前睺著个係一大片个茶園，猶有梨園。這個所在即號做上坪。穿過茶園，路過梨園，來到產業路面上，脣頭睺會著大嫲頭个相思樹，五、六月時，開一蕊一蕊黃黃个花，跔風吹落陂塘底，浮在魚塘面上金金，恬恬得人思想起。

上坪這個陂塘，中央有一細粒島，係開陂塘時留落來个，嘛係這上坪四角輪轉高出來个所在。聽講成過，主人為著監督茶園、梨園內底个辛勞、長工有煞著猛醒做事無？即會擔一張凳，坐在高高个圓墩面上，著面擎魚釣魚，著面顧工人，睺有認真做事無。主人擎魚釣魚个情景，佢識睺過，毋過實在毋知，猶

有顧工人做事个用意。五、六支麻竹笕縹共下，即係一座竹排橋，探過中央細粒島和陂塘脣兩裡。若講日頭傷猛，主人會用攔緊行轉陂塘脣，跔在相思樹下去歇涼。

印象內底，陂塘面上不時會有歸陣个鴨泗來泗去，一半下，猶有兩三隻大白鵝閒閒，在遐賞水啄魚；陂塘底有供鯉魚、草魚，猶有這滿難得睺著个鯽魚。猶記得讀小學有一年歇熱，擎一支竹做个魚釣，糶一罐蟲蟻，即釣著歸鉛桶个鯽魚，攞轉屋下去得阿依煎，園一兜仔薑嫲絲、豆豉燻，即係一落香噴噴个好料理。遐時務，屋下無錢，生活艱難，有恁个魚好食，實在係福氣个事情。

細子時个佢，識在陂塘釣魚、泗水，摸過一條一條長長膏膏个田雞婆卵，摸過一粒一粒扁扁大大粒个蚶廔。陂塘四角輪轉有相思樹以外，睺會著个做一下係茶樹、梨樹，猶有幾下頭油桐樹。嫩蕊茶青當出个時，滿園捋茶个夫娘人，笠婆縹花巾，簍子掛腰脣，兩隻手捋著兩皮一蕊个茶葉。茶子當結抑係油桐子黃到跌落泥个時，佢恬在茶園內底、油桐樹下從上從落……。

上坪个陂塘，供出真多个生命，陂塘个四角輪轉，有真多足靚个風景，猶深深刻在佢个頭那殼內底，做細子到今，佢毋識添放過！

108 年全國語文競賽客家語朗讀文章社會組（詔安腔）

編號 10 號

【一葉竹香】曾雪蓉原作

熱天轉去花蓮个客莊，暗頭歸山林个竹園，係一片天和地个渺渺茫茫，人若浸在這原鄉內底，黏時變到「耳聰鼻靈」起來。一臨風吹過，鼻著个嘛係屋前屋背个桂竹葉，隨著特別个香氣，跌落泥下。係啦，桂竹歸支係無共款个香，捋竹葉在手底撿撿个，一兜仔含著酸酸个果子香即飄散出來，破開竹，拗面貼在冷冷个滑竹面上，燥樵个味素，隔著薄薄个竹膜，又偷偷走出來，這種對竹香个記憶，毋管過了幾多年，總係係思念童年生活个秘密方式。

成過外莊人，拗係人个細莊頭號做「笠婆坑」，因為二十七甲空地个桂竹即種在莊底个山崙嶼，所以「做笠婆」即變做歸莊人个「國民運動」，大家像打好契約共款，在無共款个時間內底，做著共款个事。係屋下係在食當晝過後个一站時間，廳下个老牛牌電器風拗涼風吹做燒風啊，轉來轉去个笠婆模，猶一聲又一聲喝咿呀咿呀，抑係在討暗時，係人三姊妹和阿怙、阿依共下坐在屋下頭前个苦棟樹下，聽著「啦濟啲」，係人著面捲竹葉，爺母著面破篾，阿怙个雙腳猶會跣著音樂个旋律不時停動一下，

毋過佢破篾个速度，猶係緊攔穩，一頂頂攀好个笠婆，疊起來比遐時个係猶較高，在艱難个年代，一頂頂笠婆換來係个學費猶有新衫、新鞋。

撿竹殼係逐個細子人頭愛个，幾下臨南風吹過，跌落幾多竹殼，即有幾多歡喜。撿來个竹殼，若講屋下用毋會去，猶會用提去賣，白白帶一兜仔墨點个竹殼，係笠婆个面衫，價數頭高，較多烏點个係打底个內衫，價數無恁好，烏疏疏葉形大又歸下好好个，即炙燥留到五月節緞餡粽好用。

當然嘛有賴蹓毋甘願得風吹落來个竹殼，老經驗个係人，雙腳小可打開，續落企穩，雙手拗竹搭纏開始搖，一下子一皮皮竹殼乖乖跌落來，正在歡喜，探頭一睜，青竹絲吊在竹尾嶼，和係人目珠對目珠對睜，「哇！阿依哦！」驚到手冷腳冷，歸大陣个細子，一下子走到無睜人，毋過若南風攔吹，莊內个細子人，猶係會從到竹園內，因為這片竹園，對係這兜來講，毋單係歇熱个好所在，猶係會用趁私伽錢个寶地。

這滿係屋下雖然無做笠婆啊，行在竹林路，係猶係會捋竹葉來鼻香，嘛會撿竹殼，跔落來个時務，係親像又聽著細子人無攀無心个笑聲；今日暗夜風真大，竹園內底毋知會跌落幾多竹殼？天光日打早起來，去竹林內底收集歡喜！

【石榴樹下個誤會】郭亭好原作

佢做細子個時，屋下頭前有一個大禾坪，遐係佢人細子賞寮個好所在。放學轉來，會有人招伴在遐賞點妖精、跳格子、跳樹乳、辦家貨，歸禾坪鬧熱滾滾，細子歡喜得天，賞到毋記得時間，嘛毋肯轉。俛暗個時，即會睺著大人擎竹筴來尋自家個細子。手著面摔，嘴著面罵。細子正直直跳、直直唸、攔緊走轉去。

猶記得遐係一個拜三個下晝，毋使讀書。佢拗功課寫好即攔緊走去禾坪，想討尋細子伴寮，等有一下，猶係無半個人來。正想討轉去個時，嘎得佢睺著在阿山伯鸞種個石榴樹竦，有一隻赤龍公。佢想著隔壁個阿珠妹頭驚蟲蝎，即起稔心，伸手想討去捉遐隻赤龍公去嚇佢。無想著，在二樓收衫褲個阿山伯鸞，睺著佢在佢個石榴樹脣手伸長長，想講佢討偷拏佢個石榴，即大嫵聲喝：「喂！歹細子！你毋會用偷拏佢個石榴！」佢聽著聲，睺起去二樓，嘎得猛猛個日頭晟到目花花。阿山伯鸞攔猶較氣，直頭罵：「這天壽細子、天壽細子，想討偷拏佢個石榴，得佢捉著，猶敢睺佢，恁無受教，這毋投你依哪會用？」即恁喋喋呷直頭

罵，佢驚到毋敢應嘴，即攔緊走啊。

遐阿山伯鸞係佢人莊內有名個猴嫵，麼儕佢都敢惹、敢罵。佢做人毋單真虬，性體又稔，無想著佢恁衰，嘎去惹著遐惡桀桀個阿山伯鸞。佢著面行，著面想，著面驚，即毋敢轉，行到坑子脣一頭大樹下坐。

直直到烏昏啊，無奈何，佢正慢慢趨轉去屋下。一蹬入屋下，阿依即氣壞壞，大聲罵佢，講佢恁無教治，毋學好，敢去偷拏別儕個石榴，得人捉著又猶敢睺人，正經係拗天公借膽，即罰佢去廳下跪蹠。遐阿山伯鸞猶莊頭莊尾滿哪位去投，遐兜興事個人猶圍俛來，睺佢得佢依罵，害佢真無面子。佢感覺真委屈，和阿依嘛無相信佢，佢目汁直流直摔，硬禁蹠，毋唸出聲來。

直直到食暗頓個時，阿依正喊佢入灶下食飯。因為係得人冤枉個，佢艱難到飯嘛食毋會落。手捧飯碗，目汁直直流。阿依睺佢恁，佢嘛普普知啊，即慢慢問佢詳細個情形。了解了後即掌佢個頭，拗佢會失禮，講佢聽別儕個單向事，無聽佢講即罰佢，係佢毋著。佢會去拗阿山伯鸞講清楚，定著毋會得別儕儘採冤枉佢。

因為識發生恁個事情，到這滿佢見睺著果子攤個石榴，即會攔想起遐件傷心事；嘛係恁，這滿做阿依個佢，不時攔會提醒自家，愛尊重細子、相信細子，毋好得細子攔行佢行過個艱難路。

108 年全國語文競賽客家語朗讀文章社會組（詔安腔）

編號 12 號

【客家妹子】陳志寧原作

阿昌佢个阿怙早早即無去啊，佢兩子哀共下生活。阿依準阿怙來做，愛捍家嘛愛教養阿昌。佢真打拚，逐日做一兜瓶，孤身一儕擔去市場賣。有一日，攤頭來幾下個鱸鰻，毋知係討搶佢个錢，抑係討來刁難佢。無想著人睺起來細細漢个夫娘人，兩下半手即拗遐幾下個鱸鰻用擔竿拓到做狗爬。佢人求饒个時，這個客家妹子揸擔竿，手插腰惡桀桀講：「佢係萬巒妹子，佢即無恁便宜得你哦。」

「萬巒妹子無便宜」這句事自遐下開始即傳到滿哪位都係，一直以來逐儕都知萬巒妹子正經無便宜。毋過時代慢慢變化到今，這句事走宗去啊！尤其係在萬巒，好田好水好種作，常年个豐收得蹓在這個客人生活穩定，妹子人多少都有讀書，有知識。這滿，嘎得人感覺討渡萬巒妹子做夫娘，定著愛一大筆个聘金正有法度。誤解啊！天大个誤會啊。

其實莫單講萬巒妹子無便宜，佢人客家妹子有哪個係便宜个？客家妹子自細在屋下即田頭田尾、針頭線尾，逐日跣爺母做事顧家庭，慢慢培養出來个能力和體力，會用講食苦即像食補，

逐件事都無問題。這「無便宜」三字母係正講價數个貴賤，嘛毋係講愛用大筆个金錢正會用渡著客家妹子做夫娘。遐講客家妹子「無簡單」，係強調能力方面，係對佢人客家妹子能力个肯定，嘛係客家妹子對成過到今頭得人安謐个事。

成過个客家妹子，逐日天官光即在灶下無閒。屋下底个人食過早頓，佢人愛揸阿佻去做田个事。等到日頭落山，佢人猶在灶下無閒。一直到歸火灶个人攏睡去啊，佢正有通歇。現代个客家妹子嫁人，逐日上班食頭路。佢人日時頭在各行各業打拚，雖然辛苦一日，下班過後佢人共款會拗家庭打理到無失本分。所以恬會聽著人講，若討渡夫娘，定著愛渡客家妹子頭好。

長山過臺灣，客人毋管家境好壞，忠義賢孝个精神長久毋會斷，煞著猛醒、勤儉个傳統文化無變。客人在屋下教子嘛教女，自細即培養子女个能力，堵著事無懶尸。慢慢等到這兜子女做大人啊，成家立業過後，擱仰子艱難个生活，佢人都有法度活落去。所以講，毋係單單「萬巒妹子無便宜」，會用講係「客家妹子無便宜」。